

DEN AMBIENTE....

Fotos y Texto: Jan Poets

Mayan diadomingo 9'or di anochi atravez di Tele Aruba...

POETS TV FOR DI ESTONIA Y LATVIA CU EFREN BENITA "DAVE BENTON"....



**** DAVE BENTON** na aña 2001 a sorprende tur hende na momento cu el a gana e prestigioso Eurovision na Dinamarca, representando e pais Estonia, cual pais el a forma su bida cu un dama di dicho pais. Cu e triunfo aki, Efren Benita a marca historia den e buki di Guinness Records como e cantante di mas edad y tambe como e prome cantante di un otro pais cu ta gana e prestigioso premio aki pa un pais cu e no ta nace na dje. Pero tambe pa Estonia esaki a significa algo historico como e prome pais Baltico pa gana Eurovision. Pa corona e triunfo historico aki, mester bisa tambe cu Efren Benita a marca e puntonan di mas halto den e ultimo decada di Eurovision. E triunfo tan significante aki a pone cu nos cantante Efren Benita ta gozando di tur e beneficencia cu cualkier artista famoso di Mundo ta

goza di dje. Efren Benita tin su propio manager y show crew y hasta un representante di prensa. Na momento cu Poets TV presenta e programa special aki mayan anochi na Tele Aruba di e bida profesional di Efren Benita, sin duda algun Aruba lo bay keda hopi orguyoso di mira un yiu di tera progresa riba un pais cu ta concidera como un heroe nacional y ta ser aprecia no solamente na Estonia, pero tambe na tur e demas paisnan Baltico. Durante e programa hopi interesante aki, Efren Benita ta recorda tur su amigonan artista di Aruba, kendenan e ta hopi orguyoso di por a traha cu nan. Efren Benita ta bin di e bario di Dakota, cual bario sigur den su totalidad lo no bay perde pa mira e programa historico aki, cual sigur lo sirbi como un gran motivacion y estimulo pa tur nos Arubananon...



****DAVE BENTON** su banda musical ta consisti di e musiconan mas renombra di Estonia....



**** Embahador di Hulanda na Riga, Latvia, Nicolaas Beets, a expresa durante su discurso cu ta un honor grandi pa celebra aña di La Reina cu un tremendo cantante manera Dave Benton di Aruba, ganador di Eurovision...**



**** Aplauso tras di aplauso nos gran artista internacional Dave Benton tabata ricibi cerca e invitadonan prominente durante e fiesta special pa Embahada Hulandes na Latvia..**



**** Dave Benton** den oficina di su manager, cual manager ta un di e promotornan mas grandi di Estonia cu a realiza conciertonan cu artistanan mundialmente famoso manera Tina Turner y Michael Jackson....



**** Dave Benton** hunto cu su esposa Maris aki rumbo pa Riga, Latvia, acompaña pa su manager, relacionista publico y su dos soundman....